

四庫全書

集部

欽定四庫全書

集部

清獻集卷一至三

詳校官庶吉士_臣李如筠

檢討_臣何思鈞覆勘

總校官編修_臣王燕緒

校對官祭酒_臣鄒奕孝

謄錄監生_臣唐士彥

欽定四庫全書

集部三

清獻集

別集類二宋

提要

臣等謹案清獻集十卷宋趙抃撰抃字閱道
衢州西安人進士及第歷官龍圖閣直學士
知成都神宗時叅知政事爭新法不合以資
政殿大學士出鎮越中再移蜀郡加太子少
保致仕卒謚清獻事迹具宋史本傳是集詩

文各五卷所載多有闕時事其劾陳執中王拱辰疏皆七八上可以知其抗直而宋庠范鎮亦皆見之彈章古所稱犀而不黨朴庶幾焉其詩諧婉多姿乃不類其為人王士禎居易錄稱其五言律中暖風一首芳草一首杜鵑一首寒食一首觀水一首謂數詩掩卷讀之豈復知鐵面者所為案皮日休桃花賦序稱宋廣平鐵心石腸而所作梅花賦輕便富

艷得南朝徐庾體并之詩情殆亦是類矣乾隆四十六年十月恭校上

總纂官

臣紀昀臣陸錫熊臣孫士毅

總校官 臣陸費墀

欽定四庫全書

提要

欽定四庫全書

清獻集卷一

宋 趙抃 撰

五言古詩十五首

題邛州文同判官五箴堂

李唐韓吏部矯矯文宗師立言作諸箴勵世亦自規游
箴警情廢事業終光輝信箴慎囁囁張口觸禍機行箴
死所守於義無非違好惡不悖理戒或私是非知名懼

浮實動主嫌怨隨五者日踐履要以君子歸與可知道
粹期至嚴與窺誦已記所志礪石鐫其辭俾之揭堂上
使後亦勿墮夫人貴且富非得強自為入賢去不肖在
已不在時希韓亦韓徒中道無已而

次韻樊祖安秀才連理木

吾觀樊生者氣凌雲霄逢人肆議論芬馥蘭與椒去
年應秋詔入貢天子朝南宮擯不收歸迹如蓬飄長途
病憔悴舊里門蕭條今時賤未用無計逃諂嘲昨日升

吾堂出詩振瓊瑤自云世儒學其胄來遙遙異哉先冢
上有木名百僚一根初兩幹幹木仍駢交茂育三十稔
曷為風霜凋材奇固得地抱合勢已喬連理古所瑞於
義尤昭昭奚哉私門中福壽不可邀善祥既失效嘆惋
成長謠吾言異於是矧世逢虞堯力為君子儒進道勿
使消積德慶厥後斯木誠非妖

張景通先生書堂

志士博古今名賢口誦聖通則施所有致君翼時政窮

斯處巖穴信道宗天命富貴貧賤耶烏與一息競先生
抱蜀竒不為席珍聘學易到深處研幾劇精靜書屋數
百椽寒松夾幽徑竹森瀟洒觀泉逗潺湲聽小人多謗
訾先生自吟詠其徒識所歸歸雅不歸鄭今時自薄惡
先生自醇正其徒知所入入賢不入佞憂獎以文掾敵
邪以道勝先生終其為彼俗徒詬病

過胡元賓林亭

我嘗輕歸轅一息快心目亭橋跨幽澗廡砌森怪竹榜

句多老詞襟風不韻俗開卷味加永照泉清可掬先秋
固爽塏大夏失煩燠樂哉於道外視此樂豈足

和范御史十一月三日見月

有客冬還吳孤舟暮停潁山收亂雲彩天放新蟾影呼
童掛簾起對此清夜景橫琴弄流水醉耳誰其醒

過濠州呈前人

朝離石澗寺暮泊香山夾揚帆復順流快若兩翼插濠
州舊風物愚昔此承乏重上莊生臺如夢覺一霎

鬱孤臺

羣峯鬱然起惟此山獨孤築臺山之巔鬱孤名以呼窮
江足樓閣危壓斗牛墟直登四臨瞰衆勢不可踰贛川
繚左右庾嶺前崎嶇望闕峙其後北向日月都人家雜
烟水原野周城郭烜潤或晴雨明晦或曉晡春榮夏物
茂秋肅冬林枯氣象日千變一一如畫圖比予去諫舍
乞此養慵愚事訖得以正俗瘵得以蘇歲豐盜數息獄
命寃繫無熙然與民共所喜朋僚俱中淡有琴詠外喧

有歌飲樽罍有美酒盤食有嘉魚優游一臺上四序不
暫辜乃知為郡樂況復今唐虞

題周敦頤濂溪書堂

吾聞上下泉終與江海會高哉廬阜間出處濂溪派清
深遠城市潔淨去塵垢毫髮難遁形鬼神縮妖怪對臨
開軒窓勝絕甚圖繪固無風波虞但覺耳目快琴樽日
左右一堂不為泰經史日枕藉一室不為隘有尊足以
奠有魚足以繪飲啜其樂真靜正於俗邁主人心淵然

澄徹一内外本源孕清德游詠吐嘉話何當結良朋講
習取諸兌

寄酌蔡州王陶正言

自顧愚無堪老大何所用得郡江湖來一意雲泉縱驚
此西南身連夕東北夢乃知故人念許與明月共荆書
一紙賢李諾千金重寄我瓊瑤篇使得長諷誦寒松有
唳鶴高梧有鳴鳳何日謝知音為鼓商絃弄

次韻江鉞都官涼軒

執已剛王性誰得同趣向涕唾無所藉歸居宅深曠左
右山林間嶺屹立屏障坐期清風來未許酷日晃高棚
立西軒密葉覆其上益為晚宇蔭詎隔霞空望聖書樂
名教俗事絕塵鞅恬然寵辱驚足矣庭闈養下榻遲佳
朋盈樽倒新釀藥劑矜有靈神明助無恙賢豪重出處
詞句大奔放謂愚可與道緘遺俾酬倡忽如窮窮人獲
發金玉藏收儲篋笥光孰顧貪恠謗

題三輔院

武陽夏侯氏參立鼎峙足秉鈞相三朝仗鉞帥全蜀茅
土當時榮照煥人耳目事業申意氣遺像儼壁屋

游南山宿盤龍寺

盤龍得山名寺占山之下老師草庵居後嗣廣精舍禪
流日益盛寂照騰詩價我來誨其徒競以相誇詫少林
的的意一語獨無暇默然坐明窓孤蟾徹清夜遲曉登
終南行行與誰話

留題劍門東園

劍州古要害重門揔開闔隄防兩川地喉吭此呀呬在
昔禦狂寇如朽施巨拉時平付良守一與公論合政成
治東園於馬解賓榻予方錦官去邀我置壺榼縱步車
馬休舉目蒼翠匝攄懷談笑喧傾車潺湲雜不春亦芳
菲匪風自蕭颯主賓飲興豪量海川酒納貳車臺中舊
題詩謂予盍默默極佳處茲俗何以答

贈陽安徐邁表兄屯田

少時所學苦食蘖日自強壯歲從宦清飲冰中剛腸陽

安百里地邈在天一方惠政不鞭朴斯民樂耕桑念予
昨守輅與兄會家鄉兄今歲已滿余遽提蜀疆一朝此
邂逅五載忘參商且勿語離索易老驚鬢霜且勿較通
塞放懷把酒觴上方聖政新求賢坐明堂兄道足施設
兄志彌頡頏喜子外祖門從此生輝光

雙竹

余家有故園園中可圖錄天然一派根一根生兩竹一
長復一短比之如手足長者似乃兄短者弟相逐我見

人弟兄少有相和睦竹分長幼情人豈無尊宿將竹比
人心人殆類禽畜常記五六歲不見還啼哭及至長大
時妻孥相親族咫尺不相見相疎何太速不顧父母生
同胞又同腹旦夕慕歌歡幾能思骨肉枉具人鬚眉而
食天五穀靜思若斯人爭及園中竹

七言古詩十五首

次韻孫直言九日登龍門山

皇祐二年秋九月九日龍門遇佳節新都大夫孫隱之

報政優游共民悅升山高會賓主俱滿頭黃菊泛茱萸
遙開醉眼極千里身高氣爽胸懷舒逢時感物以次發
詩成落落傾璣珠初言府政好太守化行歲稔民力蘇
喜聲協氣遨以狂稚子負老老者扶又言登臨風景異
澄川秀野如披圖殊方真賞到奇處未來空只誇江湖
得之獨善不在已遠遣遣我開煩紆嗟我江原亦民長
周遭百里平如掌簿書役役甚囚拘聞有岷峨無計上
及聞治邑茲山奇脚力不到神魄馳誰知我亦好山者

篋中時復觀君詩

送周穎之京師

吾鄉伯堅真丈夫氣剛色強言詞踈胸中一物不使有
日儲月斂唯詩書布裘落魄韋帶緩權門不肯低眉趨
朋游累百誰爾汝人皆不與爭挪揄掩關啜菽苦意氣
糞壤玉壁泥沙珠宣慈中山我孤處昨日走介賂我書
書云詔下籲俊又父兄命穎之京都古人求養志擇祿
今而豈得逃馳驅肩書手劍出門去躋咨肯復兒女如

金剛山志卷一
我聞此語涕交下人皆欲養繫我無羨子之為與道合
勸子亟往無踟躕明年得志拜堂上豈非人子榮親歟

贈冲妙李先生

老君作經五千言勤行大笑亡與存先生有詩七百首
詔書三度來天門年登八十齒髮壯骨輕步武如雲奔
一琴一樽一爐藥人間日月從朝昏

酌張唐英

方子讞獄唐安歸火雲熾日交炎威爐烘炭赫幾千里

百鳥不能凌空飛塵埃簿牒几前滿膚汗如雨淋漓揮
俗官冗狀紛未省胸腹堙鬱氣力微蟾宮有客桂新折
怨遣詩筒懨懨拙詞佳句好吟未窮一坐涼飈奪炎熱

和范御史見贈

我趨仕途三十春矻矻求友難其人相逢採取百一二
庶幾不泯磨功名或言同途行異徑或始卓犖終因循
或臨利害失趨向或走勢利遺賤貧或面盱睢背忌刻
或口仁義心頑嚚或名公卿節屠隸或實盜跖文孟荀

澄川倏忽起波浪平地咫尺生嶙峋薰蕕蘭芷逐蕭艾
玷纈瓊玖俄砭砥茲事自古慎所與傾蓋如舊白頭新
仲尼評友戒損益故嘗佩服書諸紳履中蹈道敢不勉
至愚所恃生逢辰朝廷基局要扶助天子堯舜聖且仁
焦勞汲汲納讜議風憲思得御史真翰林鉅公不識面
誤以愚者名上陳至和改元秋九月詔書曉落長淮濱
孤貧自省預臺選無意顧藉家與身直期賢用不肖斥
忠邪路判如越秦頻章累疏辨得失上前往往嬰龍鱗

時吾貫之日聯句玉樹欲使蒹葭親為憐出處共本末
未始氣味殊甘辛忠言鯁議不我間開誠待我逾天倫
螭頭連登拜白簡豸角對拱朝紫宸雕盤隼擊雪霜凜
豺狼奔北窮狐兔九重上報不惜死豈復讒口防狺狺
避嫌歲滿體當去東南亟請辭天闥俞音分得郡印綬
毗陵地與桐廬隣潁清淮淶榜舟過橘黃酒白鱸魚珍
兒童共遊競嗟賞閭里故老相歡欣皇恩過家許上冢
我輩榮華事欲均得公長篇三四讀正似觀海無涯津

測量不可何以報贈公歲久如松筠

順風呈前人

濠州抵泗里數百長淮波平曉如席鳴犇解纜楊柳堤
畫船中有東吳客君恩得請許歸去聊治里閭去咫尺
歲窮天遠心欲飛念之汲汲事行役豁如天意適我願
號令西北起風伯初時淅淅以鼓動布帆尚留十幅窄
孤檣得勢安以平中流激箭巨浪劈篙橫櫓閣力不用
疾若挈隼增羽翮瞥然兩岸瞬雲過木葉馳黃山走碧

拏舟月餘今日快一樽自歌兩手拍樽中酒空不自歌
順風好景如之何毗陵太守同此樂為言無惜新詩多
入贛聞曉角有作

江南歷盡佳山水獨贛潺潺三百里移舟夜泊惶恐灘
畫角烏烏曉風起棲鷗宿鷺四散飛夢魂驚入漁樵耳
三通迤邐東方明又是篙工造行矣橫波利石千萬層
板繩縛纍如山登夷途終致險且升自顧忠信平生憑
將至太和寄蔡仲偃太博

我憶去年仲冬月夜醉離尊曉船發嚶嚶畫鼓上窮江
章貢川源接南粵虔州之民十萬家下車公議亂如麻
去除煩苛養疲瘵令嚴訟簡俗亦嘉農事屢登稻梁積
獄犴空虛寇哀息遠甌安堵幸實天闕然自愧予何力
邇來被旨還神京乘秋擊棹烟波行夷猶入境奚所喜
故人樂土絃歌聲

答閬州通判吳師孟職方

閬州之景天下奇常見老杜城南詩嘉陵江湍清且潔

錦屏山疊雄復峨醉翁生鍾大哉秀收拾氣象為文詞
自從屏星副郡治訟平事簡奚設施幽潛穹大極所有
搜羅詠賦一不遺州僚俊集嘉酬和海濤洶湧洪波隨
顧余不鄙可語者聯編累軸絨以貽寸珠盈掬破冥晦
尺壁入手無瑕疵窮搜囊篋暴侈富開窺秘嗇心驚嬉
竟微一毫報佳況臨紙復輟慚久之

訪何若谷

君愛仙源壓塵俗高樓對起欄干曲朝霞灼灼浮晴暉

二十四峯照羣玉樓下長江烟水綠樓前有瀨歸艎促
主人借問何時還回首崢嶸看不足

次韻僧重喜聞琴歌

我昔所寶真雷琴絃絲軫玉徽黃金晝橫膝上夕抱寢
平生與我為知音一朝如扇逢秋捨而今只有無絃者
無情曲調無情聞浩浩之中都奏雅我默彈兮師寂聽
清風之前明月下子期有耳何處聽自笑家風太瀟灑

遊金華洞

子房身乞辭大用赤松伴遊世所重高遠誰親弋外鴻
尊榮肯羨池中鳳至今仙迹存金華我來一日登三洞
回顧却笑長安人辛苦登天憑鶴控

題衢州唐臺山

唐臺歷郡東北陸勢旋力轉奔而馳偉哉造物誰其尸
一山中起高峩巍羣峯環輔拱以立背面肘腋相倚毗
怪石差差少媚色長松落落無邪姿巖隈有路數百仞
直登不悔形神疲中間軒豁浮圖舍棟宇綵錯金壁輝

寒泉一畝清可鑑優游鱸鮓揚鱗鬣猿閒鳥暇兩呼笑
老僧矍鑠趨且嬉天風烈烈骨毛竦更云六月無炎曦
攀緣絕頂下四顧溪山百里如掌窺我思宜有隱君子
放心不與時安危巢由之行已高世白雲臥此逃堯姁

寄酬梓路運使趙誠度支

喜君出使東川行臘寒擁雪辭神京平生忠力晚愈固
萬山叱馭險亦平青泥嶺惡白晝上更逢落雪百尺盈
盤高折下寸寸進馬蹄砢砢人膽驚君懷初不阻艱險

却念疆土連錦城謂予嘗有一日雅豪吟縱筆高泉傾
三章落落字字好開緘與雪爭瑤瓊置郵亟來發以誦
齒牙冷切胸懷清豈徒感服為文字所得風義推誠明
今君東轅我西守去此止有數日程兩川春物正爛漫
何時文酒親講評

謝魯魯公惠維摩居士真

問答衆口徒紛紛爭入菩薩不二門金毛獅子不敢吼
不嘿不見維摩尊維摩之尊無異相潞州傳出毗耶像

相公付與知非子掛向壁間看榜樣

清獻集卷一

欽定四庫全書

清獻集卷二

宋 趙抃 撰

五言律詩一百四首

暖風

薄袂歌雲散輕盤舞袖低
簾疎蕩樓閣塵暗逐輪蹄
絮亂垂楊道香流種藥畦
春窓惱春思一枕杜鵑啼

芳草

翠密馴文雉叢深隱畫輪離披金谷曉寂寞茂陵春古
渡班荆客長堤走馬人芊芊似袍綠一雨一番新

寒食郊園卽事

城郭青烟散郊園彩日長關雞紅錦翅游騎紫絲韁有
蝶俱含粉無人不惜芳儘拚花下飲歸去醉成鄉

杜鵑

響亂書窓外人驚夢枕中江城啼曉月澤國愴春風柳
道盤殮綠桃園踐蹠紅年年來此地留恨任西東

溪山晚目

幽花連徑發驚鳥避人啼
雨過晴虹上風清走馬嘶
灘平魚艇穩村小酒旗低
誰及山翁樂號呶醉似泥

村居

午寢忘譏刺閒居杜迭迎
雨泥雙燕下烟壠一犁耕
座入山光迴門連野色平
吟餘仍兀坐誰與戰楸枰

曲館

日華烘玉甃烟縷亘雕甍
棗熟房櫳暝花妍院落明
醉

輕春有味夢短晝無情欲識惜惜意回文織已成

題九仙寺

墜果春三徑蒸雲晚一軒廊腰回戰蟻山腹合啼猿泉
淡禽窺影苔深屐印痕自慚名利者聊免世紛喧

贈吉安院主

學佛之徒衆難能是向文唯師獨奇尚於我故慙懃詩
遇知音誦琴防俗子聞虛亭對明月長許到宵分
先與祠獄續以權市征弗克往呈通判沈侯

裝懷成倥傯從事愧風流且權征門利甘同倚市羞搖
心隨使旆極目望仙舟青玉靈壇遠終朝接上遊

沈侯見和再次前韻

舉目皆仙迹齋心遠俗流江山入詩助蘋藻為神羞去
矣登危嶠歸仍泛穩舟何勞嘆蕭索無惜話真遊

和沈侯叙別往祠嶽

席上歌驪闌風前嘶馬驕忽忽傾桂醕一一上蘭橈破
浪欣無恙依蓮愧不謬踟躕重回首雲翼自扶搖

言懷寄三兄

沿牒非吾土逢春憶故園于今佐犀帳經歲別鵲原訟
簡仍開卷時平且屬鞮江鄉去千里凝睇一銷魂

送石秘校

擊汰泛輕舳離懷莫共傷去投方朔牘歸曳老萊裳在
昔名尤重于今道已光此行有新集一一錦裁囊

和何節判觀水

澄江抵練長極目路蒼茫烟芷差差綠風荷柄柄香西

流終古恨南浦鎮時忙擬待傳辭意離人在楚鄉

和蔡黃裳節推外邑見貽二首

只應登雪嶠疑是有丹梯雨後千山秀風前一笛嘶平
時空執弭樂土不鳴顰目斷依蓮客君東我自西

冉冉成輕別遲遲想倦遊去應寬蕙帶行亦佩吳鉤訪
隱逢三徑尋真認十洲有人頻倚望何日大刀頭

和三兄見寄

棣萼遙南國蘇萱種北堂雪音何處斷風翼自回翔送

日吳天濶傳辭楚水長通宵識歸路惟夢到吾鄉

江上白樂天祠

我愛白司馬有言來謁祠才名千古照忠義一生奇諫
切寧思祿讒行却罪詩如何江上客惟道琵琶詞

有虎

有虎競磨牙逢人事攫拏夜聲聞別塢曉跡印平沙迫
路奔驚犬藏林噪亂鴉過舟無可奈極目是蒹葭

罾魚

生涯曾一架深浦勢并兼張目因知密游鱗不漏纖急
收防力跳輕語怕驚潛持去全家樂盈盤鱠縷甜

歲暮感懷

早是窮冬逼那堪客思兼事嗟流水遠年愧入春添與
雪幸同操驚霜忽到髯晚舟前浦泊何處有青帘

寄任大中秀才

今我歲將暮過橈鸚鵡洲憶君人少與買舍澌江頭客
路書多絕吾鄉夢半遊明年誰到蜀能寄好書不

向晚

向晚立汀沙人閒目更賒
林疎僧屋露風轉客帆斜
幽白孤飛鳥橫紅數抹霞
漁翁偶相問憐我宦天涯

又和三兄見寄

鄭重流芳信慙慙遠官已欣懷
袖滿仍覺齒牙寒置
速傳辭易人遐結會難
側身東望久離緒轉盤桓

送鄒舜咨回鄉

經歲別親聞于今詠式微
捐縵成後約拭袂重言歸
脫

葉迷官道酸風中客衣新文滿珍筭去去有餘輝

送余林二生赴舉

並遊攀逸軌兩喜擅佳聲鵠志一千里鵬圖九萬程青
雲今共上白水舊齊盟聖主君堪羨連鑣去策名

送李運使學士赴闕十詠

懿識本天資長才繼者誰漕舟逾萬計實廩近千斯入
境喧輿頌還鄉結主知上方思柄用何惜告謀惟

下士無虛坐摘文有話言鎮浮賢者業襲慶相君門在

郡行車樂瞻天被詔溫只應朝請日三接渙宸恩

睿簡從朝議僉俞協帝疇受釐延賈傳給饋美都侯會
府居功最朝廷錫命優思皇今在旦歸去贊宸猷

歷境號民蘇連薨競樂輸萬桑豐歲計一節赴朝趨安
穩舟無恙雍容騎甚都贈言聊紀盛為頌愧非夫

傳姻聯世美振玉擅家聲南楚聊均逸東臯亦勸耕察
廉無遁物刺舉有能名宣室今前席寧庸羨賈生

早擅雲間譽嘗登月裏名十輪門襲慶萬石世傳榮待

繼開賓閣聊為擁使旌績成今第一歸作漢公卿

荆衡此駕軺封郡去相遼國廩矜流衍農疇喜富饒幾
時無協氣何處不謹謠漢室通糧道論功最後蕭

南榮來漢詔北闕近堯天懿績隆三歲豐儲備九年威
嚴多摘伏薦籍幾登賢去去民思甚銷魂盡黯然

歌闕散雕筵膺舟是謫仙秦亭臨斷岸楚水浸遙天魏
闕瞻湖上長安指日邊綵旂隨目遠一向立風前

供帳楚江濱瞻言淚滿巾如何從事客曾作受恩人再

顧溝中物尤慚席上珍異時調鼎應許與陶鈞

和戴天使重陽前一夕宿長沙驛二首

詰旦逢佳節今宵寓遠鄉且欣賓榻解休歎客亭長
黃葉臨風亂紅萸浥露香酒徒何處所空自憶高陽
楚館夜衾涼離人念故鄉遠吟只覺苦歸夢不成長
壁有寒蛩怨鄰聞綠蟻香登高在何處明日宴山陽

聞楊旼病愈

湖南楊叔武消息有人傳連歲征蠻徼經秋臥瘴烟為

時天未喪勿藥病還痊
雲水溶溶去憑詩寄此篇

入蜀舟中逢春

春到依羈旅懷開似發
絨野禽鳴勝管春草綠於衫
水暖風微碎山明日半銜
巴西寒極地冰雪尚千巖

入蜀江上對月

照不私毫髮波光上下浮
明餘到琴淡清極入詩幽
忽認江湖畫渾疑天地秋
閒雲勿輕蔽有客坐孤舟

春日陪宴會春園亭

為怕三春過因謀數刻狂醉輕欣射中歡甚惜歌長躋
馬花間繫啼鶯柳下藏前旌歸去晚十里淡風光

月夜聽僧化宜彈琴

蜀國有良工孫枝斲古桐逢師寫流水為我益清風淡
恐時心厭幽斲世耳聰坐來明月滿無語訟庭空

送蜀守賈昌朝水部赴闕

名節下英藩歸轍望帝閣中和刺史政孝友相君門去
聽塗歌美留瞻壁像尊欲知春色好元是百城恩

送曾交屯田赴闕

治多祥氣感

公為三江邑有甘露靈芝瑞草之異

名可信書褒詩有千篇

富才為兩蜀豪任誠時少與敦義世推高
劍棧芳菲地公行我亦勞

和范御史初出都門

牘奏辭三院鄉榮領百城帝恩山嶽重臣命羽毛輕
風月隨人好江湖照膽清須公贈金玉光照重行行

和韻前人初出鑠頭

奏懇初無飾天恩亦重違一麾新命下兩槩故關歸淮
木林林脫霜鴻陣陣飛賢朋詩酒樂行矣自相依

和石澗寺龍潭

一過湯王早須為傳說霖只應蟠澗底濟物是初心昔
歲苗將槁陽驕不和陰農夫望膏澤徒蟄爾何深

和通判范都官不赴賞春

幽郡少叢事名園邀上賓逢花有深意拚醉欲酬春僚
友同年舊郎官拜命新不來無此樂還似姓車人

續夢中作

邊寄今儒弁，惟籌得將才。
甘辛均士卒，號令走風雷。
驚曉城聲急，吹秋隴笛哀。
先聲羌膽碎，聞道漢兵來。

次韻吳充學士齋居冬夜書事

輪奐相輝映，嚴扉聳畫楹。
霜空夜月午，齋冷湛冰清。
鰈輪與相輝，映嚴扉聳畫楹。
霜空夜月午，齋冷湛冰清。
鰈輪與相輝，映嚴扉聳畫楹。
霜空夜月午，齋冷湛冰清。

和六弟抗江上書懷

一失已戚戚，誠哉勿爾為。
因知賢者事，不與衆人期。
別

金匱要略卷二
浦客帆卸隔江漁笛吹同行兄弟樂還免動鄉思

驚濤

路半狂飈起江心巨浪橫蒼茫舟子叫匍匐稚兒驚古
岸移時入新醪薄暮傾此宜無足道大抵似人生

別後寄表弟李定

之官雖異數行棹欲同仙忽覺清風遠因驚俗累牽子
留書得後我愧約乖前境上依依過江南水拍天

彭澤狄梁公祠

賢正屯蒙日陰邪會用時人從萬死過誰肯一言危毒
意回天后忠誠薦東之復唐三載留得枕江祠

經鄱陽湖

捨陸事川程霜天曉色明長波萬頃濶大舸一帆輕靜
唱村漁樂斜飛渚鴈驚雲披見樓閣隱隱豫章城

次韻何若谷賞花即席

朋心照舊明寧比蓋初傾共惜花兼酒誰論利復名與
君如有約不醉似無情更遇詩勅敵周旋未易輕

紀雨

歲始三日雨恩隨萬井春如何至和氣先被遠方人洗
濯山川秀霑濡草木新堯仁際天地調變有臣鄰

次韻提刑蔡挺度支見贈

歷章初請外亡狀愧瘵官為郡恩尤重斯民治素難訟
稀逢薄稔詩倡得清歡況復仁封接焉依簞與管

次韻何若谷中隱堂觀碁

春晝僧房靜枰枰戰氣豪斜飛沙塞鴈奔怒海門濤決

勝周旋久陰謀計較勞豈知中隱士心不掛纖毫

送興國令徐師回殿丞

報政方山下分攜贛水濱人蒙百里惠花見四年春親
志樂戲綵家聲高縉紳還期逢慶節慈宴拱嚴宸

登章貢臺

章貢東西派并流作贛川奔湍出城曲離合向臺前把
酒來憑檻鳴聲見放船滔滔歸底處滄海路三千

次韻周敦頤國博重陽節近見菊

為僚初自喜邀客亦逢嘉把酒須同樂分襟莫預嗟未
成登畫舸好共賞黃花試向東籬看秋叢映晚霞

題張果老洞

洞老壽松椿高名古絕羣亂山泉瀾瀾舉世事紛紛使
者持丹詔先生臥白雲方今莫招隱君德正華勛

贈琴臺僧正

寺古傍郊垌門無車馬聲我來聞衆妙人少到師清錦
水金波靜銀蟾一指明幽琴徐發響真不負臺名

留題修覺山

按行車暫尼身得止崢嶸江喜淙淙聽雲疑步步生春

鄰花縣好晴遠劍關明買石鐫豪句高哉老杜名

老杜有數

章因令
刻其上

次韻孔憲山齋

訟簡歲豐盈鈴齋竟日清窓排羣石怪簷擁遠山明古
木風千葉新髭雪數莖開樽向幽處餘論見高情

送前人赴闕

正性歸忠誼名談見本原中丞有賢子宣聖得真孫解
職留民惠還朝拜主恩東方要安堵一為上前論

次韻吳中復龍圖題長橋鋪

山東去蜀右不憚客程遙酒酌杯中醪琴攜囊下焦故
人題大筆佳句刻長橋快讀離懷解如冰暖日消

寄衡僧惟簡

南禪衆所稱簡老是真僧法器聞雖古清風見未曾洪
爐中點雪大海裏孤燈七十休官近歸歟我得朋

寄謝毛憲

去賴八千里於今十二年

予嘉祐末被詔還臺

無緣久東浙

自政府得

請錢塘半稔徙蜀

有命再西川

今再任成都府

吏散庭空訟

謂守度日

僧高

寺欲禪

度之東禪長老深悟理性

老來思舊治尤喜獲佳篇

送范憲百祿赴闕

泥書下紫宸公議協朝紳真主正圖治諫官今得人從容陪國論憔悴恤天民大對如晁董公嘗素所陳

和榮諲學士按部過長瀆闕所寄詩

金史
卷之三
叱馭窮邊壘還轅賞驛梅微香心旋吐清詠意尤瓌誨
墨蒙兼貺郵筒喜屢開錦官花更好翹望牕前回

閔雨

閔雨詔復下傷農今四春潭龍從號懶廟鬼詎能神苗
槁塵生久雲空電轉頻天公誠可問誰與主陶鈞

次韻李元方秀才秋日旅懷

節物奚為感秋懷不自任曉寒侵遠夢秋力助高吟薄
脫驚風葉疎春隔水砧商絃調一曲惟子定知音

題靈山寺

我為靈山好登留到日曛巖幽餘暑雪鐘冷入秋雲篇
詠惟僧助塵煩與俗分明朝入東棹因得識吾文

寄題致政周洙屯田如詔亭

誥出義方語亭更如詔名為郎拜天寵有子擅家聲健
羨鄉評美光輝野史榮綵衣官亦重門外擁雙旌

致政都官宋兄言歸舊隱贈行

休官鎮浮俗眉壽冠同年恬養八十歲苦吟三百篇乘

秋迺杖屨終日隱林泉我羨歸歟樂高蹤不可肩

游海雲山

縹緲齊雲閣遙聞摸石池物華春已盛人意樂無涯羅綺一山遍旌旗十里隨花棚夾歸道驍騎看星馳

次韻程給事赴越任過杭相會

已久論交契何妨醉別筵君宜歸大用我獨倦高年郡印今分治科名昔共鐫離懷雖一水言遠似三川

題杭州雙竹寺

粉籜雙雙脫修篁兩兩高同心齊管鮑並節漢蕭曹寒
歲霜威禦炎天暑氣逃此君真可異吟遶不知勞

送章岵少卿提舉洞霄宮二首

秘館紅塵外瑤京白日邊樽中不空酒琴面已無絃曉
上朝真閣春耕負郭田優游大自在何處更神仙
使節罄忠勤東南兩見春清宵多假寐白髮半憂民金
闕遙辭寵琳宮去謁真羨公誰最甚我是欲歸人

次韻趙少師寄別程給事

人生難會合天與此階緣
逸駕來艱遠孤颿映後前
吳江阻潮汐越嶠望雲烟
叙別情何厚新詩兩燦然

送六弟隨子之官毗陵

鴈序暫分飛毘陵動所思
廉能真有子清白素聞詩
船

泛西州遠

皆謂弟

山尋北蕩奇

自云

明春復歸會還是隔年

期

覽先祖太傅留題國清寺繼和

得謝殊狂客無言愧淨名
心觀潭月白梵聽海潮聲
曉

色開華頂秋暉照赤城公詩播人口冰玉未為清

抵永嘉題謝公巖

嶺路與巖垌池樓古郡城千年溫俗意四榜謝公名

嶺岩

池閣皆榜謝公

寄傲留佳句遺思出至誠滔滔慎江水東注等

休聲

贈鄭賡高士

易有幽人象天垂處士星知音辭相府

杜祁公范文正公昔留門下予

以思親因辭而歸

歸養為親庭閒和碧雲句深窮白首經惟賢

二千石優顧眼尤青

早離溫江夜泊白沙步

曉與諸孫別依然頗動懷去乘蘭棹穩行得綵衣偕漁父
逸連市村扉半掩柴夜來溪上宿夢已在高齋

次韻寄致政石牧之大夫

予退喜同休翻思慎水遊閒雲披遠岫明月在高樓送
目千餘里離懷三度秋爭如禪客子截斷衆江流

寄酬吳天常中散

仕契最敦厚，夤緣絕儼倫。同登甲戌第，俱是戊申人。把酒曾四老分攜，又五春新詩光篋笥。珠寶未為珍。

送毛寬任清流主簿

輕舟離曉岸，涼氣滿秋空。鸞枳從官況，蟾宮繼父風。榮塗終頡頏，清節愈磨礪。今我所期子，名當徹舜聰。

西湖吳中允墳生芝草

中允壽齡尊，人亡德尚存。無根彼芝草，為瑞此松墳。往行稱鄉井，遺榮付子孫。靈苗豈虛設，所應在高門。

送吳栢節推赴闕

簡刑憂俗困一境被恩私清極人知勸誠先吏不欺席
觴徒眷戀岸菊漸離披薦鶚有餘表橫飛去指期

宿故梁子正得意堂有感示諸梁英少

遺訓素諄諄先生冢尚新門風競蘭玉鄉譽動簪紳戶
牖宵排燭琴書晝拂塵子孫為學盛宜有起家人

外弟李定少卿輓詩三首

子舍競詵詵號天日月昏有綃傳秀像無藥反英魂右

棘官虛位西山墓閉門遣余衣上淚時復有啼痕

少列吾姑子懷能負俊良歌詩追李杜筆札出鍾王道

指三千遠

子時還朝道至南康軍奄忽

年踰六十七嗟哉長已矣冠

劍失威光

福地生奚似喪人送幾何環環山水秀蟄蟄子孫多情
悼魂兮些辭憑挽者歌嗟余身在越西首淚滂沱

故吳丞相充輓詩三首

富貴三朝老公忠百辟師躋民復仁壽與國繫安危聖

意加優注榮途亦屢辭人嗟五福內獨不享期頤
論道尊三事登庸歷十年舜嘗咨爾岳說已濟斯川太
史書清德高門繼象賢都人瞻繪像袞服冠貂蟬
純誠先德行餘事著文章所予維中壽難謀彼上蒼旌
銘籠曉月挽鐸訴秋霜自愧居田里無緣奠柩觴

寄開化余遵道

野老余遵道人微德義尊家居青嶂底身在白雲根盛
事傳閭里昌期付子孫不煩迂步遠此去自高門

清獻集卷二

欽定四庫全書

清獻集卷三

宋 趙抃 撰

五言排律十九首

謝賜飛白御書宴羣玉殿

朝野歡和際君臣愜樂時聖謨天地久睿藻日星垂內
閣羣編啓靈函衆寶披光華頒帝翰密勿寵官師雨露
神毫洒風雲上意綏翔翔轉鸞鳳天矯奮龍螭侍宴聆

清問銜杯拱昧儀御香蒙領袖和氣入肝脾言念宸恩
重曾非賤士遺天顏瞻咫尺臣職愧箴規補闕難言袞
傾心竊比葵養賢兼養正所願易求頤

同天節

土寓歡呼日天家慶誕辰虹光流渚異電彩遶樞頻物
與薰風浹祥并協氣臻庭除交玉帛宴衍列簪紳丹穴
來儀鳳華封祝聖人小臣叨下列鼓舞頌堯仁

送韓丞相琦出鎮陝右

羌狄方懷德朝家正右文邊城輕舉動天子為憂勤公
位三朝重威名萬里聞聊煩鎮西夏盡得護諸軍賜第
仍開燕傳觴命極醺陝民如望旱一雨壓塵氛

急帆

江濶北風長高帆盡幅揚勢能分巨浪力恐拔危檣鷗
鷺頻驚迫魚龍相助忙峯巒旋岸碧木葉走汀黃快似
登仙去輕於傳羽翔一程三百里晚泊未斜陽

初入荆江

迢遞辭宸闕遷延換歲華舟纔入荆渚人覺在天涯浪
激多推岸流濡足沸沙勢盤帆小便漲淺路頻差橫艇
叉魚浦搖旗賣酒家山微思念越江窄止通巴烟色汀
蕪淡風光野燒斜蠻歌朝競唱祠鼓暮連樞渡口初逢
柳林邊未見花前程春始盛一一待詩誇

送昭文劉少卿移知南海

世緒傳英德時才播令名錦綢終襲慶桂籍舊升榮仕
路登優績朝闈服俊聲風猷著臺閣操尚冠簪纓墳衍

方謀學冰霜未底清分憂膺間寄頒教洽輿情會府資
謀計中閤念篤誠漢庭當繼好戎帳去修盟通幣旋君
節飛芻擁使旌丹車勤轉漕倉廩慶豐盈廉士祈甄用
貪官愧竄驚鳳書來輦轂熊軾鎮荆衡壓境無喧訟連
疇近力耕騰謠聞五袴行樂護千兵道路纖塵絕人家
協氣生渙恩飛睿詔華序拜名卿更直羣書府于宣百
粵城祖筵徒戀戀仙舸重行行預想歌來暮前期報政
成上心方簡注元鼎佇和羹

送同年何推官

決恩頒漢檢沿牒別熊川免作徒勞嘆聊為從事賢
財文囊製錦贄畫幙依蓮志尚心非石標儀骨是僊贈言
驚去矣攜手覺淒然遠目渾疑斷離腸已似煎馬嘶楓
葉道人醉菊花天到日成優績宸綸佇九遷

庭楠

彼美庭楠植基培幾十年夜來全庇月曉去薄生烟萬
葉光齊動雙株影共圓幽棲疑有鶴清響為留蟬飲對

傳三雅琴依按七絃河陽花自媚彭澤柳空眠勢翳門
闌靜陰清几案鮮不才逢訟簡吟遶強成篇

蜀倅楊瑜邀遊菴畫池

占勝芳菲地標名菴畫池水光菱在鑑岸色錦舒帷風
碎花千動烟團柳四垂巧才吟不盡精筆寫徒為照影
搖歌榭分香上酒卮主人邀客賞和氣與春期

寄謝雲安知軍王端屯田

舊邦逢朐覬靈地接岷峨住嶺排烟火懸巖引薜蘿雨

花疑錦濯晴水甚藍接遠地之官去孤舟走嶮陀出麾
無一事傾蓋首相過幸不愚煩外欣承議論多春光千
騎駿天色百城和賞物樓新構鐫文石旋磨為時即慷
慨得友盛吟哦世重黃金諾人傳白雪歌投壺傾立馬
飛鏑屢鳴鼉局戰遲敵玉杯歡亂酌螺坐來風入袂歸
去月流波我愧才疎拙生微術揣摩主客勤勞徠行色
覺蹉跎匪用詩為好離懷可奈何

江上遇雪

凍雲交四隅飛雪滿江湖急勢團風轉閒容到水無並
遊漁喜唱失侶雁驚呼客棹沿灣泊村醪覓徑酤去程
方數蜀歸思正遙吳得句同諸弟余懷幸不孤

登望闕臺

江外三千里城頭百尺臺神都瞻寶闕星斗切瑤魁風
濶春襟快雲披曉月開山川增氣象欄檻出塵埃天際
橫歸鴈林梢露出槐喜逢冠蓋客半是日邊來

次韻何若谷別後見寄

言念分符日來逢別乘賢瘡痍求俗去風教為民宣吏
獄都無擾農疇屬有年歡嘗陪射的清不廢鳴絃避俗
尋蕭寺遊春醉畫船文揪坐惟幄詩敵肆戈鋌邂逅窮
江地淒涼落葉天代還公去矣佇立我依然久契誠彌
固離憂不暫蠲高臺倚章貢時一誦佳篇

成大卿宅矮槐

手植踰三紀年隨矮勢增枝盤多蠓屈根轉欲虬騰密
覆周遭地孤撐最上層風條低偃蹇烟葉碎鬚髯顧我

來雖羨如公退未能溪園饒樂事時此會佳朋

遊青城山

三十六峯峻維岷在蜀奇方行刺史部重款丈人祠凍

雪諸蕃隔晴雲六面披訪山窮寶洞

山有寶仙第五
祠昔投龍之所勅

鬼覘豐碑泉落寒崖響籬依古木垂良工存舊筆

青城
觀壁

悉孫知
微名畫

老叟琢新詩

句符台示
岷山集

陟險齊雙屐逢幽鼓七

絲盤桓不忍去還作更來期

喜雨

火官施酷令曦馭肆炎威魃虐詩嘗刺巫焚禮舊譏神
將明德應人用至誠祈有幸真天與先期不汝違四郊
雲黶黶三日雨霏霏色動田園喜聲無里巷歎終圖實
倉廩已足賤珠璣報彼民咨者恩斯帝力歸

引年自喜

乾坤報不得犬馬戀無緣請有再三瀆生踰七十年雲
山充素志霜雪滿華顛遠矣日邊地歸歟春暮天灘長
釣臺客棋久爛柯仙去樂林泉下何勞一指禪

次韻程給事會稽懷古即事

東南杭與越形勢夾長川地占一方秀天生萬象全兩
城俱卓爾列郡豈加焉異世稱無間同時較有偏厥民
如貴簡彼國實居先大海收淮瀆羣山冠幅員古人蹤
欲見遊客目先穿況自醇風俗從來省朴鞭有年人既
庶樂教志彌堅每得前朝事當由衆口傳土疆歸闕下
州宇闢湖邊未苦秦來幸先經霸擅權有賢思避世擇
地效高眠盤屈稽山勢嵯峨玉笥巔茂林侵碧漢修竹

掛青烟東浙潮聲近西陵草色鮮四明登陸顯五泄夾
溪沿漁浦從舟楫仙居遠市廛山青難入畫花灼正如
燃石傘陰遮徑松潭韻佩絃千峯雲靄雙澗水潺湲
靈迹曾遊處清風可坐延龜浮山出浪龍去井迷年泉
湧尋源出蘿繁附木纏屏危開石上星摘射巖前仙髻
傳今古峯形露醜妍法華初賜號釋子已超禪一感因
人異羣言可理詮遍隨高下賞潛解利名牽民室常盈
目城闔異及肩通幽雲底路朝接洞中天必有千年隱

都忌萬事煎嚴園烟水亂樊榭柳花顛聖閣迎仙母湖
樓望綵船越臺凌縹緲溪女鬪婢娟野景誠無限遊人
豈獨守清虛宮刹古恍惚歲時遷寶相靈猶驗雲門瑞
復還塵埃籠古壁章句列前賢醮禮因勤甚龍宮尚儼
然魚池乖本意僧罟觸輕漣鑿石成金像營庵對玉蓮
瑰奇天桂室瀟洒寶林篇歷歷森豪俊昭昭著簡編蘭
亭真翰筆桃谷舊神仙想像人堪慕淒涼物足憐公卿
誇道路父子遁林泉廢宅仙宮立還鄉世事捐嗟時徒

役役味道益乾乾種墓藏山穴叢祠闕水壩方干栖逸
地祖貫起英躋相隱今遺跡侯封昔見旌錦衣慚我得
車帳為民褰臣力難堪矣君仁未舍旃挺身徒盡瘁報
德乏微涓所向知師古干時愧學圓幾衡中切冒條教
外頒宣每慕黃居頴曾卑隗相燕有為懷黽勉無術可
收甄得請鄉邦便躬祠祖壠虔耕桑初勸諭飢疫偶成
連賑發無深患疲勞獲少痊闔封方富稔載路息迤邐
近幸同年代前符昔日緣一麾來鎮撫千騎為盤旋弊

政因民革煩文到日蠲恩隨和氣決令比置郵遞美譽
皆騰實清香已勝羶善良陶靜化姦猾洗前愆吏畏輸
心鑒民深入善淵課書人第一軺名里逾千身起侯藩
政班趨秘殿聯謀猷光帝座議論溢經筵道合風雲會
功高玉石鐫正宜裨日月未可問園田士論逾時望人
心曷月湔聲名加顯顯歌頌轉翩翩預喜明賢遇須知
直道便中宸深有眷外補實難銓行為山陰老聊收一
大錢

次韻程給事同孫覺學士楊憲景畧天衣謁禹廟

夜歸

梵宇近靈祠，偕遊薄晚歸。
雲疎通日影，風景作霜威。
博約詩情健，盤桓酒力微。
旌麾分韻，頑戈戟聳光輝。
左右車帷徹，周連燭炬圍。
湖流平杳杳，泉派濺霏霏。
却念觀珪劍，禹廟仍欣賞鉢衣。天衣廟樓臨浩渺，寺閣倚嵯巍。
燈火還城市，烟波遠石磯。
鼓鐘初警動，騶馭始分飛。
勝槩同時遇，賢朋共樂稀。
佳章蒙寄貺，隣愧得仁依。

次韻林希喜趙少師繫遊杭

維嶽生台輔於時正典刑我嘗同政府公早謝明廷官
貴躋三少身閒越八齡所難惟壽算豈易是康寧求舊
心猶壯尋幽足未停宋都俄暫別吳語喜重聽宗契今
逾厚交情久可銘摘辭工詠物吐屑妙談經嵐色迎紅
旆湖光動綵舲游名多寫壁燕席旋張屏忽遇瀛洲客
新辭使者星承恩來玉陛泣事傍沙汀厭賞塵中景思
登野外亭愛忘嘉意重溢美雅章形叙遠才超絕搜奇

思杳冥道山寧久去歸路入雲青

五言絕句十九首

麓山十詠

真身湖

湖上有真身寺因以名

晚光澄水月秋影顛風幡宛是真如地荷花護翠軒

升中古栢

雪挫更霜摧寒心未易回庭前皆古意何必問西來

書院

雨久藏書蠹風高老屋斜鄰居盡金碧一一梵王家

四絕堂

千燈傳靜刹四絕號虛堂已是金銀界仍為翰墨場

洞真觀

木老巖坳冷泉飛月殿寒栖真無一事清嘯倚欄干

抱黃洞

靈洞古壇基烟蘿接翠微日西春又晚不見羽人歸

嶽麓寺

古木與雲齊門前百丈梯我來煩想滌疑是過靈溪

白鶴泉

靈派本無源因禽漱玉泉自非流異竇誰識洞中僊

法華堂

峯頂已崔嵬因高更築臺夜分僧定起咫尺見雲雷

拜嶽石

片石倚中天雲深鳥道間人多祝堯壽登此拜南山

過雲安軍下巖僧舍

幽寺倚巖阿雲扉掩薜蘿老僧中燕息誰問世風波

橫溪洞飛泉

寒瀑落春巖天垂百丈練更疑仙客宴不捲水晶簾

和范御史過陳州

灣盡疑無路堤回忽見橋冬空仍水後物物稱蕭條

題魚關

奔流出萬山亂石鎖孱顏彼躍龍門者何嘗懼此關

男胤生日

重九登高節陽秋稟氣和家家懽會日祺壽所宜多

次韻吳天常

塵事不留毫誰云夢寐勞因思四老會今復數年高

戊午

歲余邀叔平少卿同行湖上時
君與吳著作皆和詩號四老云

書琴壇

制動必原靜治人先正心風乎畫壇上退食鳴璫琴

和范御史石倉晚泊

天迴旅懷濶風長野叫來

日暮江上有數十人連
續長歌人謂之野叫

滄波

清可愛先為濯京埃

覺林寺

古寺無碑刻僧云不記年自餘安所問惟是愛林泉

七言律詩一百首

禁籞見牡丹仍蒙恩賜

校文春殿籞天關內籞千葩放牡丹風捲異香來幙帝
日披濃艷出欄干芳菲喜向禁中見憔悴憶曾江外看
剪賜從臣君意重數枝和露入金盤

次韻三司蔡襄蘆鴈獐猿二首

省宇屏圖哲匠成，寫傳蘆鴈筆尤精。
斜依風葦叢叢裏，遠颺烟波渺渺平。
弋者定嗟何所慕，鵬搏莫怪不能鳴。
公看羽翼飛騰處，有意青雲萬里程。

獐狎猿馴遂性情，恍然疑不是丹青。
豈憂夜獵林中去，只欠秋吟月下聽。
舉目便同臨澗谷，此身全恐寄郊坰。
山容野態窮微妙，造化爭功六幅屏。

憶信安五弟拊

鴈殘鸚鵡洲邊過憶汝東吳住舊廬誦聖窮愁千卷外
覓官留滯十年餘也知失意能平氣底事多時不寄書
兄在松溪我荆楚別懷三處一欸歔

飲酒

江頭落寞窮冬日天末崎嶇薄宦身休問世途千態巧
且貪杯酒十分醇顏間戚戚成何事醉裏熙熙即是真
梅雪半殘烟柳吐一番消息又青春

和十二弟揚鴈月立春

二十四日立春節六千里孤舟行呼兒倒酒迎春醉
忽爾持詩屬我賡海上去年賓燕樂江頭今歲客心情
興來極目尋春色岸柳汀蕪綠未成

除夜泊臨江縣言懷

縣封蕭索楚江澄旅沉吟懷冷似冰漏促已交新歲鼓
酒闌猶剪隔宵燈立身從道思無愧得路由機患不能
未報君恩踰四十青春還是一番增

泊巴陵聞曉角

五更鐘後斗沈杓畫角三番塞角調青草湖平無俗籟
岳陽樓迴有寒飈酒腸喚醒維舟靜夢眼驚回去國遙
我愛清餘起傾耳欲吟情思已飄飄

憶輦下寄同年楊子卿

一思平日禁城春直上青霄步步雲在月香名欣共得
挾天綵藻愧相聞滿頭競插花千柄沒案誰辭酒十分
蓮水今為從事樂伊予無復嘆離羣

送交代楊推官

三載從軍績用成代還京闕黯離情亭長且作班荆飲
江迴愁聞唱棹聲前席去當回帝問初筵今已號賓榮
交承叅袂宜敦好莫惜殷勤重報瓊

早霧

山光全暝水光浮數里霏霏曉未收露彩乍凝迷漢殿
日華不透掩秦樓豈饒文豹遲留隱應有靈蛇取次遊
聖世妖氛已銷盡結成佳氣滿南州

寄里中親友

記得城南數刻懽，破歡爲別淚闌干。
問關遠道初隨牒，寂寞長亭一據鞍。
郊外此時涼葉亂，嶺頭平日臘梅殘。
不辭頻寄南州信，草檄無功楮墨乾。

席上感別送桂倅

照人冰骨是真仙，失臂江西僅十年。
子擁倅車袍著茜，我趨賓席幕依蓮。
今宵把酒方歡甚，明日班荆又黯然。
八桂到須多假日，府中佳醕主公賢。

和人清明有感

湖外清明物態繁
曉林鶯舌關關闌
枉緣春意無時盡
自是人心不暫閒
舊隱東君曾藉草
新官南郡亦登山
滿頭花卉盈樽酒
且向東風一破顏

和三兄得書喜授掌庠

區區宦況遠南州
長得歸鴻與寄愁
已勝折腰嗟五斗
豈辭銜尾運千舟
冰含白玉期無累
路迫青雲愧可求
家有舊塤流韻遠
勉將文藻贊宸猷

贈狄節推

唐嗣幾危國步艱梁公忠力世難攀不辭鼎鑊君臣際
為正朝廷子母間今見裔孫仍白首去從幕府綰青綸
旌賢有後十二代轉覺勲名重泰山

勸學示江原諸生

古人名教自詩書淺俗顏風好力扶口誦聖賢皆進士
身為仁義始真儒任從客笑原思病莫管時譏孟子迂
通要設施窮要樂不須隨世問榮枯

送何孟侯先生之平原

束書攜劍出西州
恩舊相歡事遠遊
架上昔曾窮聖卷
幄中今好贊賓籌
也知賢帥須青眼
應念慈闈已白頭
到日欲憑歸信杳
塞鴻成陣叫清秋

題杜子美書室

直將騷雅鎮澆淫
瓊貝千章照古今
天地不能籠大句
鬼神無處避幽吟
幾逃兵火羈危極
欲厚民生意思深
茅屋一間遺像在
有誰於世是知音

春日雪雷並作

東君新用少陽時正月羣陰老未歸千里雪花鋪夜景
數聲雷鼓作春威欲開桃李嗟寒勒尚蟄龍蛇恨力微
一挫芳菲一驚物惘然無處問天機

初入峽

峽江初過三遊洞天氣新調二月風樵戶人家隨處見
仙源雲路有時通峯巒壓岸東西碧桃李臨波上下紅
險磧惡灘知幾許晚停征棹問漁翁

過嶺回寄張景通先生示邑下同人

二年官役愧能名賢得斯人幸合并幾度孝廉交郡辟
一生文行出鄉評君廬皂水江頭遠我馬青泥嶺頂行
西首胡為書以贈欲持同邑寄諸生

下牢津

拖舟百丈苦攀躋一過牢津恍似迷花放亂紅迎彩旆
谷傳深響答鳴輦避人幽鳥凌雲噪抱子驚猿走險啼
春岫重重春水綠却疑身在武陵溪

同萬州相里殿丞遊溪西山寺

使君呼客入山行
曉徑前驅照彩旌
蠻女背樵巖側避
野僧攜刺馬頭迎
千層雲水迷三峽
一闕人烟認百城
樓閣憑餘清我聽
竹風蕭瑟澗泉鳴

送黃賁赴渭州機宜

我愧非才敢贈言
告新今幸接英躔
炎威滿路千山去
和氣流民百口傳
就捧絲綸天子命
到參帷幄主人賢
前籌要使邊陲靜
報德銘功願兩全

次韻張著作贈講禮孫秀才

金少卿集卷三
大席橫經事講評暫開雄辯五河傾十年素蘊胸中吐
一日清風坐上生諸子授來疑頓釋先儒宗後業偏精
塵編古有多門學今喜公能為發明

酬楊鴻漸察判見寄

進不驚人退不藏竭來士術惠殊鄉疎餘益信琴多樂
拙甚方虞錦重傷顧我未能精俗事感公偏遺好詩章
懷間得勝千金直莫謂無人識夜光

送崔度推官任滿還長安

三歲西州此效官，幙中無事有賓歡。
瞻雲預喜長安近，歸騎還驚蜀道難。
分袂天涯逢臘盡，入關時候正春寒。
前途應念朋從意，回首秦亭一據鞍。

謁青城山

背琴肩酒上青城，雲為開收月為明。
觀宿有詩招主簿，劉絳詩約同遊廬空無分遇先生。
張俞出山墻留古畫仙姿活，石載

奇文俗眼驚。却念吾鄉山亦好，十年孤負爛柯行。

次韻孫直言正旦馬上有感

蜀國從官又見春物華人事兩俱新已推才力多餘地
更賦詞章妙入神要路我甘無俗迹夷途公自有通津
逢時得用看施設未止區區庇遠民

次韻僉判俞尚都官寄兄君然中允致政

勇退如公世少儔樂天知命富春秋
戢戢去得寒宮桂
泛泛歸乘雪水舟舉目烟霞中有趣
無心軒冕外何求
引高應笑朝闈客白首龍鍾未肯休

和淮上喜雪呈貫之

落雪紛紛甚羽毛相逢淮上繫輕舸壓低酒力威稜健
助豁詩懷氣象豪兩岸遠山供玉障一天長水盡雲濤
歸歟喜見豐年瑞南顧無煩帝力勞

和潁川見徐學士

臺閣官資屬二賢歲寒相見潁流邊新醪喜泛千鍾蟻
永漏驚移數葉蓮致主聖神躋舜禹濟時功業企閔顛
故人清會俱高論肯事狂歌學少年

次韻范師道御史

昔如李郭去登仙今復東行並客船
夾岸雲山千里路滿襟風月九秋天
持杯旋斫桐江鱸覓句頻賡蜀國箋
君到七閩佳麗地荔枝紅發欲殷然

和見雪

驚怪窮冬百物繁落梅狂絮逐風飈
酒無戈甲爭酣戰詩似波瀾競討源
且卸帆檣隈斷岸好開屏嶂畫孤村
知音若問陽春曲待把琴調細細論

新定即事

泉高終日聽潺湲花草纔佳爛漫看言念君恩得私請
敢於身計學偷安開元刺史名千古東漢先生釣一竿
賢迹勉尋余自愧牧民猶帶觸邪冠

初到睦州寄毘陵范御史

前日鵬鴻接羽儀平生風誼見施為蘇臺薄暮分襟後
嚴瀨逢佳佇立時歸棹豈能忘舊里去筒猶未寄新詩
寒泉繞石山環坐一弄南風慙所思

和范都官述懷

人為閒郡我為榮僚友多歡事少生詩裏江山今共樂
籍中龍虎舊傳名逢時自可青雲致喜老休將白髮輕
垂世功名期力到上方求治急材英

勉郡學諸生

桐江為守愧顓蒙來喜衣冠好士風勸學重思唐吏部
教人多謝漢文翁濟時事業期深得落筆詞章貴不空
道有未充須自立莫將榮悴汨於中

和彥塗田曹見寄

自喜還家入郡閤久無書簡到京城
慕觀每笑機心巧
琴斷還憂曲意生
厚祿萬鍾身外薄
冷泉千尺耳邊清
來詩詠歎陶然樂
疑夢釣天奏九成

送范都官

莫惜芳樽細細斟
還臺詩句滿離襟
海潮風駕漫幽渚
鄉岫雲開認故林
八月氣涼歸棹快
三年恩厚在人深
紫宸曉拜天光近
宜有封囊悟主心

和前人重九日寄

金少隱先生集 卷三
丁字溪流甚箭奔忍看行色夕陽村三吳望遠迷烟棹
九日登高泥酒樽詩得瓊瑤今有意感充懷抱更無言
歸歟一曲桐江好西北通宵欲夢魂

新定獲龜繼得梓漕攜之赴官

買自桐江數歲前潔中輕外欲巢蓮同麟薦世宜為瑞
邀鶴尋真定得仙肯示吉凶貽後悔祇隨呼吸到長年
主人幸不煩供養俾託輶車看兩川

過子陵故祠

帝念先生素所親殊恩終不顧絲綸圖勲恥預凌烟像
辭貴甘為擲釣人雲水孤高教適意俗風奔競使還淳
如今丘壑無遺士天子思賢號聖神

次韻石溫之都官見贈

桐江得請上恩榮孤士慚無善可旌望闕天光驚已遠
到家春色喜先迎雲邊舊念青山隱鑑裏新逢白髮生
多謝賢朋遺佳句重於珍璧價連城

憶松溪三兄縣尉

憶別揚州六月中
倏今三已換
春冬烟帆去蜀七千里
雲嶺瞻閩幾萬重
莫為沈迷嗟下邑
要將清白廣吾宗
天遙最是書難得
早倩來鴻寄一封

次韻鄭琰登睦州高峯塔

舊迹蒙君麗句誇
昔同峯頂躡雲霞
逢秋謁寺留詩筆
薄暮歸鞍照月華
旋酌香醪浮甕蟻
關烹新茗滿甌花
心餘更作儒官會
帳內諸生擁絳紗

得守虔州過鄉邦贈別衢州太守高賦同年

俞請分符入贛川過家為幸獲於天桂宮舊有同年契
梓里今逢太守賢醜酒殷勤供去帳解囊分耀貯離篇
曉來頗覺思君夢烟水蒼茫隔畫船

守虔過家登高齋即事

舊里徘徊忽四旬高齋高勝足懽忻當軒曉看山橫黛
負郭秋成稼覆雲酌酒屢邀朋契樂弄琴真與俗喧分
虔州莫訝遲遲去鄉便恩榮荷聖君

寄永倅周敦頤虞部

君去濂溪湖外行，倅藩仍喜便鄉程。
九疑南向參空碧，二水秋臨徹底清。
詩筆不閒真吏隱，訟庭無事洽民情。
霜鴻已到衡陽轉，遠緒憑誰數寄聲。

虔州即事

君恩山重若為酬，補郡都忘樂與憂。
惶恐灘長從險絕，鬱孤臺迥足觀遊。
贛川在昔名難治，鈴閣于今幸少休。
人謂濶疎予自喜，遠民安堵更何求。

次韻何若谷都官燈夕

千門燈燭事遨遊車馬通宵不暫休
幸免烟氛遮皓月任隨笳鼓雜鳴騶
金壺漏下丁丁永玉笋霞生艷艷流
帝澤遠臨人鼓腹贛川宜有太平謳

次韻徐師回殿丞捧詔亭聽琴

訟錡無譁去訪真並遊僚友若天倫
庭存列宿仙壇古堂啟先生詔墨新
膝上揮絃清度曲席間傾耳靜留神
泠泠不斷綿綿意追想南風解愠人

寄知福州范師道龍圖

十年游霧入蘭薰本末聊同出處均五嶺昔將巴蜀遠

君漕南粵日
予漕梓益路

七閩今與贛川隣

度福
接吟

雪中始見松難改

火後須知玉是真事業他時公自任致君堯舜澤吾民

次韻何若谷寒食燕集

雨過江城絕點塵清明佳節正千門舞香撲坐花新戴
歌響盤雲曲旋翻幾欲為春留日馭直須同俗醉衢樽
因思老氏登臺樂若此斯民未足論

次韻錢顗喜雨

山川靈秀降豐穰十里油雲澤我疆為叩明神虞歲早
故飄甘澤助春陽征人共解江頭纜遊女爭誇陌上桑
令尹愛民形喜色作詩先已報豐祥

次何若谷上巳遊江

袂褱追修宴集開山川聊為霽風雷衣冠愜樂觴傳羽
旗鼓號呶笛弄梅畫鷁穩移隨岸曲珍禽驚避逐波頽
百城錦繡人如織笑看使君乘興來

次韻錢顥見贈入學聽講

文翁治蜀澤民深賴守無堪愧士林長有務先庠序教
講磨思見聖賢心今茲未肯孤毫善學者尤宜念寸陰
三百餘篇金石奏席間願聽得遺音

次韻何若谷寄提刑蔡挺

遠俗期年荷德豐一麾烏足滯才雄朝簽寄任非輕外
聖詔丁寧果發中却念松楸還里閭再馳牛犢懇天聰
只應未遂歸歟興江右澄清已望風

次韻楚守孫直言職方見寄

間闕來賴會年豐十里農桑畫障中雨足山川多秀氣
暑消臺閣有清風人驚地遠還同近誰道江西不似東
琴酒從容隨分樂敢將身計事怱怱

次韻廣東轉運董儀職方同年見寄

顓守無堪出榜中日聞將漕稱才雄感公迢遞詩筒至
謂我優游訟鉅空高會正遙千障月羈懷聊寄七絃風
何時把酒朋從樂也待醒狂學次公

次韻黃伯度虞部見贈

念昔相逢向上方別來驚已換星霜夢回半是烟波阻
詩寄全篇篋笥光近喜歲豐無劇訟更多雨足壓驕陽
施為自顧如何爾鳬鶴奚煩問短長

聞杜植移使湖南

去歲南來幸守麾故人江上喜新篇十分勸我流霞酒
一曲聽公白雪詞此後拙疎真有賴而今談笑杳無涯
驚聞擁節重湖去憑仗西風寄所思

留題悅亭因簡何若谷都官

翠栢環庭數畝閒蕭疎仍是枕江干都如君子憐松茂
半爲主人諳歲寒素壁留詩多健美畫船過里暫盤桓

公倅度
代還

因公此景予心喜亦有高齋待掛冠

公嘗題
高齋詩

送前人過鄉還朝

景祐賢科昔共登長沙賓佐復交承三千里外今同郡
二十年前舊得朋賴水帆檣驚遠別玉峯欄檻到先憑
朝廷正是求材日欲應仙鄉算未能

公家玉筍山
下有玉峯亭

次韻董儀都官見贈

予嘗宰海陵踵公肅
美政之後故云嗣英

海陵余昔嗣英僚舊尹咨新治有條此別風波嗟各路
但聞名譽籍當朝美夫郡接瀕江地幸矣民多樂歲謠
南國故人千里隔舉頭雲嶺鬱岩堯

同周敦頤國博遊馬祖山

曉出東江向近郊舍車乘棹復登高虎頭城裏人烟濶
馬祖岩前氣象豪下指正聲調玉軫放懷雄辯起雲濤
聯鑣歸去尤清樂數里松風聳骨毛

南康公餘有作

道未中充氣未閔聖神遭過本寒生廷中入愧言無補
嶺下來欣治有名世路計身焉用巧古人逢物要推誠
從容章貢臺前望贛水秋天一樣清

次韻周敦頤國博見贈

蜀川一見無多日潮水重來復後時古栢根深容不變
老桐音淡世難知觀游邂逅須同樂離合參差益再思
雖有黃花樽有酒大家尋賞莫遲疑

和虔守任滿前人香林寺餞別

顧我入趨堯闕去煩公出餞賴江頭為逢蕭寺千山好
不惜蘭船一日留清極往來無俗論道通何處有離憂
分攜豈用驚南北水濶風高萬里秋

次韻衡守陳守言職方招遊爛柯山

賢侯九日去尋山牽俗無由得附攀

守嘗見約是日換
以事弗克同往

世昔傳仙局久登高今喜使車還平原豐稔農歡勸
犴獄空虛吏放閒從此爛柯光價起為留佳句落人寰

按獄眉山舟行

攜琴曉出錦官城千里秋原一望平放舸急流身覺快
披雲孤嶼眼增明農田雨後畦畦綠漁笛風前曲曲清
訊獄遠邦先滌慮卹哉休戚在民情

次韻蔡挺提刑出巡將還

榜契推誠積有年天淵沖躍見魚鳶方欣友會為愚幸
又辱詩情著意緣庾嶺棠陰留遠俗贛川舟御若飛仙
明朝預想陪高誼滿座清風盛暑天

會新都孫直言于成都

同志同年分若親幸從天與豈闕人交情舊別江鄉晚
客宦今逢蜀國春酌酒強論賢否事畏塗休說利名身
鄰封却喜無多遠來往詩筒莫厭頻

題三泉縣龍洞

蜀道羣山盡可名更逢佳處愈神清初疑谷口連雲掩
入見天心滿洞明怪石磷磷蹲虎豹飛泉落落碎瑤瓊
崑崙別有神仙路又得攀躋向上行

成都西樓

多暇朱欄倚望頻
遠雲開即見峨岷
昔賢初盡經營力
今我獨為優幸人
勝閣簾高惟掩雨
老臺民樂只登春
爭如蜀國西樓好
四序風光日日新

張公二月二日始遊江以集觀者韓公絳因創樂俗亭為駐車登舟之所

長橋東畔尼朱輪
畫棟雕欄錦水濱
子美浮槎傳大句
非崖遊棹看芳春
樽罍泛泛留佳客
鼓吹喧喧樂遠人

夾岸香風十餘里
晚隨和氣入城闌

韓公絳嘗遊故云

和交代韓公絳端明別後見寄

關山晴曉過綿州
兩蜀人思惠愛稠
去路旌麾朝日下
駕空橋棧接雲頭
初觀妙句離懷釋
似酌清泉渴恙瘳
孤緒搖搖更東望
西樓千尺止三休

寄謝蒙州守周源屯田

念公別後固依然
蜀距炎方里數千
劍棧過來纔一月
詩筒傳得已三篇
胸藏忠誼堅於石
口吐文章湧似泉
何日解符還闕去
如今朝野不遺賢

運使王舉元兵部因談道惠詩次韻

初窮文字作階緣若得嘉魚即棄筌堪笑蚊蠅驚八月
豈知龜鶴壽千年無心是處非闕境有命由來不在天
自古君臣悉功行不然終未到神仙

送前人還都

蜀道將輸茂績成遠人安靖歲豐盈發施號令岷山峻
除去貪憚錦水清一旦賜環來日下九秋乘驛度雲程
朝廷禮盛榮歸好親見吾皇講太平

榮諲學士按部未還因寄

欲見遐阡盡樂康
沈黎回即按嘉陽
尋山舉屐三峨峻
度嶺驅車九折長
塢栢正宜寒後悅
驛梅多向牕前芳
錦川遨樂春期近
早著鞭來入醉鄉

題天彭鮑郎中南樓

彭門於蜀最無雙
人悅南樓重歎降
灑灑鳴泉漱金玉
森森佳木擁旌幢
仙飈出洞清來坐

彭門多
仙山

巖雪排巖

冷透窓太守瞻雲日
登向巴江迢遞隔吳江

公以親老
數奏乞便

鄉官

贈玉局李垂應太師

坐觀山水地幽清恬淡冲虛樂性情跡混光塵宗老氏
術通仙俗似君平欣逢真侶論根本恥向權門叩利名
濟世金丹得傳授先生高隱在青城

張先生邀
乃其師也

成都轉運翠錦亭

羣木依亭翠錦開主人吟燕日徘徊青幃照坐初疑染
紺障鋪簷不是裁蟻酌對傾金斝滿鴨頭前引五溪來

勸公勿用遲留賞早暮須賢即召迴

提刑邢夢臣度支連理荔枝

嘉陽天遠被薰風荔子呈祥郡館中庇本莫將慈竹較
媚時寧與瑞蓮同並柯晝聳烟光動異幹霄空月影通
奇木幸逢真賞筆誰誇丹實一庭紅

送蘇察刑部赴召

有詔西來亟治裝古今威望重癡牀不煩右蜀專飛輓
直為南臺正紀綱豸角風霜秋肅肅鶴形環珮曉鏘鏘

忠賢得用朝廷美禮法匡時事業光

次韻張唐民都官道中有懷

言念離情積有年朋心金石孰為堅
殿廬未入承明直郡閣先傳太守賢
且向天涯行五馬不妨神液溉三田
聞公比悟莊生指於此紛華已泊然

再經江原縣有作

徙命乘輅入錦川岷沱寒霽好人烟
彈琴舊治俄三政持斧重來未十年
欲去民憂同樂只敢孤朝寄獨恬然

邑城東望踟躕久魏闕天遙里數千

招運判霍交回轅

自邛之雅漸高丘所過從容盡勝遊
白鶴山頭雲裏寺
金雞關外雨中州
公今南按蠲民瘼
歲已酉成輟上憂
江濱荷花開似錦
且同歸去採蓮舟

遊青城山

山到青城險復奇
地平孤起壓坤維
直通一徑岩巉上
俯覺千山迤邐卑
為訪隱賢題古壁
因觀幽境過荒祠

白雲深處逢巖老，醉酌松醪滿鬢絲。

題張唐英祕校桂香亭

月中新得桂香清，歸向斯亭立美名。
作賦仗前登第好，拜恩堂下到家榮。
曉羞蘭鱖親心樂，春照藍袍俗眼驚。
跬步不宜輕自待，青雲岐路坦然平。

送蜀倅楊瑜東歸

倅郡優游得治聲，代還東出錦官城。
一州和氣三年迹，萬里寒威十月行。
江外預通鄉信喜，仗前歸拜帝恩榮。

逢今僉用良材日好使明堂大廈成

送張唐英司理赴渝州

不用咨嗟愴別離聽吾持酒祝公詞少年得第人誰似
純孝於親里共推姓字已通丞相夢

今丞相文公因夢嘗以詩遺君

名須結聖君知獄情要在平生允容駟高門自有期

題運判霍交瞻岷閣

閣外風光滿意新諸公同上看梁岷蜀天六月雲如火
夷界千峯雪似銀巖叟近傳多得壽羽人曾此數登真

夫君不為神仙事早暮孜孜澤遠民

送張唐英太博

蜀卿榮耀跂光塵忠孝兼全到古人萬乘累年聞奏牘
雙親同日拜恩綸志侔鸞鵠風儀遠文得岷峨氣象新
聖政於今急賢者肯教留滯蜀江濱

寄酬梓路運使趙誠度支

東川使者駐前旌西念鄰邦眷舊情屐齒峻登雲頂寺
詩筒遙寄錦官城民間樂矣原田稔境上熙然獄犴平

聞說提封足和氣我心懽快為宗盟

次韻蔡仲偃都官南歸留別

留詩為別重依依春浪桃花曉弄暉
柯嶺崢嶸何處所蘭橈安穩送將歸
與君志有雲泉約顧我身無羽翼飛
浮石仙今遺跡在吾廬江畔憶漁磯

次韻孫直言書懷

四十驚霜入鬢新道光休歎守官貧
榮塗漸快青雲步寵祿方酬白首親
此日文詞誇世俗異時才術濟吾民

功名立去何憂晚要得相期到古人

青州勸學

學欲精勤志欲專魯門高第美淵騫文章行業初由已
富貴榮華只自天一簣為山先聖戒寸陰輕璧古人賢

沂公庠序親模範今日諸生為勉旃

學之始自
王丞相興



清獻集卷三